



LEKSYON 5
PAGTUKOD SA
IMONG PANIMALAY

Matun-an Nimo Niining Leksyona

Unsa Man ang Panimalay

Ang Importancia sa Panimalay

Importancia ngadto sa nasud

Importancia ngadto sa katilingban

Importancia ngadto sa usa ka bata

Importancia ngadto sa bana ug asawa

Ang Kristohanong Panimalay

Sala makapabungkag sa panimalay

Unsa man ang Kristohanong panimalay

Pag-ampo sa panimalay

UNSA MAN ANG PANIMALAY

Unsa man ang panimalay? Ang panimalay mao ang dapit diin ang usa ka pamilya nagpuyo. Dili usa ka panimalay ang usa ka balay nga walay nagpuyo. Naga-sugod ang panimalay sa bana ug asawa. Madungagan kini sa ilang pagpanganak o duna bay motipon kanila nga mga paryente, ingon pananglit sa mga ginikanan nga mga tigulang na.

Sa dihang gibuhat sa Dios ang panimalay nga sumbanan, gihatagan Niya si Adam ug Eva sa usa ka pinasahe nga dapit aron ilang pagapuy-an. Usa kini ka

matahum nga tanaman nga pagaatimanon ni Adam. Gusto usab sa Dios nga ang kada panimalay karon adunay dapit nga diin sila magkahiusa ingon nga usa ka pamilya. Ug Siya nagpaabut nga atimanon gayud nila ang ilang panimalay. Bisag unsa kaubos sa atong panimalay, gusto sa Dios nga mahimo kining madanihon ug hayahay aron ang pamilya magkalipay nga magpuyo niini.

Adunay daghang klase sa panimalay sa kalibutan. Ang klase sa butang nga gigamit sa pagtukod sa panimalay dili kaayo ang labing importante. Ang labing importanteng butang mao ang pagtinagdanay sa mga sakop sa sulod niini. Mao kiniy makapahimo sa usa ka panimalay nga maayo o dautan. Ang panaghigugmaay sa tanang sakop sa panimalay mao ang labing importante.

Ang panaghiusa sa panimalay hinungdanon kaayo sa pagtukod sa hustong pagtinagdanay sulod sa balay. Ang panimalay dili lamang usa ka dapit diin ikaw mokaon ug matulog. Ang pamilya kinahanglan nga magahin ug panahon diin sila managhiusa sa usa ka buhat nga makapahimo kanila nga magkasuod. Sa pagkatinuod, ang pagtinagdanay sa pamilya usa ka labing importanteng bahin sa panimalay, busa kanunay natong magamit ang pulong panimalay inay sa pulong pamilya.

Buhata Kini

1. Unsa man ang panimalay?

ANG IMPORTANCIA SA PANIMALAY

Importancia ngadto sa nasud

Ang mga maayong panimalay maoy patukoranan sa mga maayong nasud. Ang panimalay maoy unang kapunongan sa katilingban sa kalibutan. Gisugdan kini sa Dios. Unya misunod ang ubang mga kapunongan sa katilingban—escuelahan, kasimbahanan, tribo, balangay, lungsod ug mga nasud.

Si Annie Cressman misulat: “Ang panimalay sama sa usa ka gamayng kagamhanan. Ang amahan mao ang presidente, ang inahan mao ang bisepresidente. Nagtina-bangay sila sa usag usa sa pagdumala sa panimalay. Naga-himo silag mga maavong kasugoan aron ang ilang mga anak adunay malinawong dapit nga kapuy-an. Ang ilang mga kasugoan magatudlo sa mga kabataan sa mahusayng kinabuhi ug pagkamasinugtanon. Kon ang kabataan makakat-on sa pagsunod sa mga sugo sa ilang ginikanan sa ilang panimalay, masayon na lang unya nila ang pagsugot sa ilang magtutudlo sa tunghaan, sa ilang pastor, ug sa ilang nasud.”

Buhata Kini

2. Sa unsa man nimo ipakasama ang usa ka panimalay?

Importancia ngadto sa katilingban

Ang katilingban nagadepende sa pamilya aron kini mahimo. Ang pamilya mao ang naglangkob sa katilingban ug nagapatunhay niini gikan sa kaliwatan ngadto sa kaliwatan. Ang usa ka maayong pamilya nagahatag sa iyang mga anak sa mga maayong pagtudlo nga ilang gikinahanglan aron mahimong mga maayong sakop sa katilingban.

Ang bata nahimugso diha sa panimalay. Ang una niyang mga kauban mao ang mga sakop sa iyang panimalay. Diha sa iyang panimalay mahulma ang iyang kinaiya ug batasan. Diha siya makakat-on sa pagtagad sa ubang mga tawo. Kon unsay iyang nakat-onan sa gamay nga hugpong, mao usab ang iyang buhaton diha sa mga dagkung hugpong sa katilingban ug sa kalibutan.

Busa, ang klase sa pagtudlo nga gihatag sa panimalay ngadto sa iyang anak, mao usab ang klase sa mga tawo ang anaa sa atong katilingban. Ang usa ka maayong panimalay magatabang sa ilang anak sa pag-umol sa ilang batasan, sa pagbati sa kaakohan, gugma, pagkamatinu-manon, ug pagtahud sa katungod sa uban.

Buhata Kini

3. Unsa may nagapahibalo kanato kon unsang klaseha sa mga tawo nga magabuhat sa atong katilingban?

Importancia ngadto sa usa ka bata

Ang panimalay importante kaayo alang sa usa ka bata. Nagaumol kini sa iyang batasan ug kinaiya ug nagatabang sa paghulma sa iyang panlantaw sa kinabuhi. Kon unsay kakuyaw, suliran ug mga kahigawad nga iyang maatubang sa gawas nga kalibutan, kinahanglang masayud siya nga siya makapauli sa iyang panimalay aron mahigawas gikan niini. Didto siya pagaabiabihon. Ang iyang mga ginikanan nakasabut kaniya, nahigugma kaniya ug magaaamoma kaniya. Ang usa ka malipayong panimalay, bisan unsa kini kakabus, magahatag sa usa ka bata ug pagbati sa kasegurohan. Makatabang kini kaniya sa pagugmad sa iyang kinabuhi hangtud siya mahingkod.

Ang usa ka bata nagakinahanglan sa gugma, pagamoma, kalipay ug pagpanalipod sa usa ka maayong kristohanong panimalay. Kon unsa ang iyang gikaon, importante kini alang sa panglawas ug sa iyang pagtubo. Ang gugma sa iyang mga ginikanan ug mga igsoon sama kini kahinungdanon o labaw pa gani, alang sa iyang panglawas ug kalipay sa iyang tibuok nga kinabuhi.

Atong ipakasama ang usa ka panimalay sa usa ka escuelahan. Ang mga ginikanan mao ang magtutudlo. Ang mga bata mao ang magtutungha. Ang ginikanan nagtudlo sa mga bata sa ilang mga leksyon pinaagi sa ilang mga pulong ug sa mga linihokan. Sa kanunay ang Biblia magapabasa kanato niini:

I Mga Hari 15:3. Ug siya naglakat sa tanang sala sa iyang amahan.

I Mga Hari 15:26. Ug siya naghimo sa dautan sa mga mata ni Jehova, ug naglakaw sa dalan sa iyang amahan.

Ang panimalay mao ang dapit diin ang kinaiya sa tawo mahulma. Usa ka dakung kamatuoran nga nahiba-loan na nga ang nakat-onan ug ang batasan sa usa ka bata nga iyang nakuha sa wala pa moabut ug unom ang iyang panuigon, magpabilin kini kaniya sa tibuok niya nga kinabuhi. Busa, kon ang panimalay dili maayo, daku kaayo ug posibilidad nga ang mga bata usab niini dili usab maayo. Kon ang panimalay maayo pagkadumala pinaagi sa gugma, ato gayud nga mapaabut nga ang mga bata usab niini mahinadlokon sa Dios, matarung ug kasaligan. Sila mahimong panalangin ngadto sa kalibutan.

Buhata Kini

4. Unsang butanga ang importante alang sa kaayohan sa usa ka bata nga sama ka-importante sa pagkaon nga iyang gikaon?

5. Unsaon man nimo pagpakasama ang panimalay sa escuelahan?

6. Unsay kalabutan sa panimalay sa batasan ug kinaiya sa bata?

Importancia sa ngadto sa bana ug asawa

Usa sa mga hatag sa Dios alang sa kalipay sa tawo mao ang panimalay. Diha, magbahinay ang bana ug asawa sa ilang kalipay, ug kasakit, buluhaton ug paglingawlingaw, suliran ug kadaugan.

Ang panimalay mao ang escuelahan alang sa mga ginikanan ingon man sa mga anak. Ang ilang kasinatian nagatudlo kanila sa pailub, pagsabut ug panghunahuna alang sa uban.

Ang panimalay mao ang dalangpanan gikan sa kagubot ug mga suliran nga maatubang sa tawo sa iyang buluhaton. Ang gugma, kalinaw, ug ang presencia sa Dios sa usa ka Kristohanong panimalay maghatag kahapsay ug kalig-on sa bana ug asawa pagtagbo sa ilang kaakohan gawas sa ilang panimalay.

Usa sa mga dagkung katuyoan sa panimalay mao ang pagpahimugso ug pagpatubo sa mga bata. Ang pagtinabangay sa kaakuhan ingon nga ginikanan makapasuod sa bana ug asawa. Ang mga bata sa panimalay maoy nagahingpit sa kalipay ug katagbawan sa kaminyoon.

■ **Salmo 127:3.** Ang mga kabataan mao ang panulondon ni Jehova.

Wala kini magkahulogan nga ang usa ka magtiayon nga walay anak tinunglo sa Dios. Subo nga palandungon nga ang ubang magtiayon walay anak. Ang Biblia wala magatugot nga biyaan niya ang iyang asawa tungod kay dili siya manganak o mangasawa siyag lain sa mao gihapon nga katarungan. Ang Biblia wala magtugot sa usa ka asawa sa pagbiya sa iyang bana tungod kay kini dili makahatag kaniya ug anak. Bisan tuod nga usa sa mga katuyoan sa kaminyoon mao ang pagbaton ug mga anak,

ang defecto sa usag usa kanila wala magahatag ug katugod nga mapala ang ilang kaminyoon.

Ang Biblia naghatag kanatog mga sanglitanan sa mga magtiayon nga walay anak. Ug kini silang tanan nanag-ampo ug nagpangita sa Dios. Si Abraham ug si Sara nag-ampo nga makabaton silag anak ug gidungog sa Dios ang ilang pag-ampo. Si Ana nag-ampo ug usa ka anak nga lalake ug gihatagan siya sa Dios ug bata nga iyang ginganlan ug Samuel nga nahimong usa sa mga gamhanang punoan sa Israel. Daghang mga magtiayon nga walay anak nga nagsagop ug mga anak. Nagapana-lingin ang Dios kanila sa dihang gihatagan nilag panimalay kining mga bataana. Ug ang mga bata ug ang nagsagop kanila nagkalipay sa ilang pagminahalay.

Salmo 113:5, 9. Kinsa ba ang sama kang Jehova nga atong Dios. Ang babaye nga apuli ginapabantay niya sa balay ug mahimo siya nga inahan nga malipayon sa mga anak.



Buhata Kini

7. Usa ba ka malinawong dalangpanan gikan sa kagubot sa gawas ang imong panimalay? Pag-ampo nga magpanalangin ang Dios niini sa Iyang kalinaw.
8. Unsa man ang usa sa mga daghang katuyoan sa panimalay?

.....

.....

.....*

9. Gitugotan ba sa Dios nga magkabalag ang usa ka magtiayon tungod kay sila walay anak?

.....

Nganli ang duha ka butang nga angay nilang buhaton.

.....

.....

.....

ANG KRISTOHANONG PANIMALAY**Sala makapabungkag sa panimalay**

Daghang mga panimalay nga halayo kaayo sa katuyoan sa Dios alang kanila. Ang sala nagabungkag sa unang panimalay. Wala sunda ni Adam ug Eva ang Dios, ug kini nagadala kanila sa daghang kagubot ngadto sa ilang panimalay. Inay kalipay ug gugma, miabut ang pangabugho, panagkaaway ug pagpatay diha sa ilang pamilya.

Nagapabungkag gihapon ang sala karon sa daghang mga panimalay. Busa usa sa mga unang butang nga buhaton sa bag-ong magtiayon aron makabaton ug malipayong panimalay mao ang pagseguro nga sila naluwas gikan sa sala. Walay edukasyon, bahandi o hataas nga katungdanan nga makapahimo sa usa ka panimalay nga malipayon kon anaa ang sala. Nagkinahanglan silag usa ka kristohanong panimalay.

Buhata Kini

10. Unsa ang nakapabungkag sa unang panimalay?

.....

11. Unsa may unang buhaton sa usa ka bag-ong magtiayon aron makabaton silag malipayong panimalay?

.....

.....

.....

Unsa man ang Kristohanong panimalay

Unsa man ang Kristohanong panimalay? Usa kini ka panimalay nga nagaila ni Cristo ingon nga Ulo sa balay. Kinahanglan nga Kristohanon gayud ang bana ug ang asawa ug dili lamang sakop sa usa ka simbahan nga mosimba matag Dominggo ug dili maghunahuna sa Dios sa ubang mga adlaw. Si Cristo kinahanglang anaa sa panimalay ingon man usab sa simbahan. Kinahanglan siyang pasidunggan ug sundon sa adlawadlawng pagkinabuhi. Unsa ang gisulti ni Pablo ug Silas ngadto sa magbalantay sa bilanguan nagapadayag kanato nga ang kaluwasan alang sa tibuok nga pamilya.

Mga Buhat 16:31. “Tumoo ka sa Ginoong Jesus,” miingon sila, “ug mamaluwas ka – ikaw ug ang imong panimalay.”

Josue 24:15. Alang kanako ug sa akong balay, kami magaalagad kang Jehova.

Buhata Kini

12. Unsa man ang Kristohanong Panimalay?

.....
.....

13. Unsang mga bersiculoha sa Biblia nga nagatudlo nga ang kaluwasan alang sa tibuok nga pamilya?

.....
.....

Pag-ampo sa panimalay

Sa wala pa matukod ang mga kasimbahanan nagtudlo ang Dios sa tawo nga ang amahan maoy mangulo sa panimalay sa pag-ampo. Siya maoy usa ka sacerdote o pari sa iyang kaugalingong pamilya.

Karon, ang pastor sa atong mga simbahan maoy atong espirituhanong pangulo. Ang pamilya kinahanglang moadto sa simbahan ug maghiusa sa pag-alagad sa Ginoo. Apan ang amahan gayud maoy ang espirituhanong pangulo sa panimalay. Tukoron niya ang hiniusang pag-ampo uban sa tanan niyang sakop sa panimalay ug magabasa sila sa Biblia. Kini gitawag nga "family altar" o "family devotions."

Kinahanglan nga sugdan sa bana ug asawa ang una nilang adlaw sa kaminyoon pinaagi sa hiniusang pag-ampo ug himoon nila kini nga kanunay sa tibuok nilang kinabuhi. Magahin silag panahon adlaw-adlaw sa pagbasa sa Pulong sa Dios ug sa pag-ampo. Himoon kini sa buntag sa dili pa ang bana motrabaho, o sa gabii human sa trabaho, o sa panahon diin ang ubang buluhaton dili kaayo makasamok.

Ang laing bahin sa pag-ampo diha sa sulod sa panimalay mao ang pagpasalamat sa Dios sa panahon sa tingkaon.

I Timoteo 4:3. Apan gibuhat sa Dios kining mga pagkaon aron nga uban sa pagpasalamat, pagadawaton nila nga nanagtoo.

Buhata Kini

14. Unsay kaakohan nga gihatag sa Dios ngadto sa mga amahan sa wala pa ang mga kasimbahanan?

.....
.....

15. Unsa man ang hiniusang pag-ampo?

.....
.....

16. Pasalamat ang Dios tungod sa imong panimalay. Pangayoa Kaniya nga Siya maoy mapasidunggan sa tanang buhaton sa inyong panimalay.

17. Pag-ampo alang sa mga panimalay sa imong mga higala.

18. Susiha ang imong mga tugag sa katapusan niining leksyona.

19. Sulati ang imong rekord sa estudyante nga makita sa luyo sa basahon alang sa leksyon 5.

Mga Tubag sa Leksyon 5

Kon ang imong hustong tubag gikan sa 13 ngadto sa 14 markahi ug labing maayo ang imong papel. Gikan sa 11 ngadto sa 12, maayo; gikan sa 8 ngadto sa 10, kasarangan. Kon ang imong hustong tubag mokubos sa 8, basaha pag-usab ang leksyon.

1. Ang dapit diin magpuyo ang pamilya.
2. Usa ka gamayng kagamhanan.
3. Ang klase sa pagtudlo nga gihatag sa panimalay.
4. Ang gugma sa iyang panimalay.
5. Ang mga ginikanan mao ang mga magtutudlo ug ang mga estudyante mao ang mga anak.
6. Ang kinaiya ug batasan nahulma diha sa panimalay diin siya nagpuyo sa tibuok niyang kinabuhi.
8. Ang pagpahimugso ug pagpatubo sa mga bata.
9. Dili. Pag-ampo nga makabaton ug anak, ug pagsagop ug mga bata.
10. Sala
11. Seguroha nga sila naluwas gikan sa sala.
12. Usa diin si Kristo mao ang Pangulo sa panimalay.
13. Josue 24:15; Mga Buhat 16:31
14. Pagpangulo sa iyang panimalay sa pag-ampo.
15. Mao ang pagbasa sa Biblia ug mag-hiusa sa pag-ampo uban sa tanang sakop sa pamilya.

Pila ang imong hustong tubag

Grado